

Resúmen kòrtiku i splikashon proposishon di lei kambio di e Luchtvaartwet BES (Lei di Aviashon BES) pa krea base pa obligashon di servisio públiko

- Ku e proposishon di lei aki lo inkorporá un base legal den e Luchtvaartwet BES (Lei di Aviashon BES) pa stipulá un obligashon di servisio públiko riba rutanen tiki eksplotá entre aeropuertonan na Hulanda Karibense i/òf entre e aeropuertonan aki i otro aeropuerto den Reino. E lei ta ofresé un base pa un futuro areglo ministerial ku lokual e Minister di IenW (Infrastruktura i Maneho di Awa) por establese un obligashon di servisio públiko (public service obligation, PSO).
- Ora establese un PSO, Gobièrnu Sentral por stipulá ku kompanianan aéreo, bou di kondishonnan spesífiko, mester sòru pa suficiente fasilidat di transporte den e área ei. Por trata di tur kompania aéreo ku por suministrá transporte a base di e Multilateraal Protocol (Protokòl Multilateral) na e parti karibense di Reino. E Reino tambe por skohe pa selektá ún kompania aéreo via un kontratashon pa ehekutá buelo a base di e PSO. Den un PSO por establese kondishonnan pa kompania aéreo relashoná ku preis di ticket máksimo, frekuensia mínimo di buelo, kapasidat, i kontinuidat.
- E alkansé di e lei ta konserní tur tres isla BES. Pero ta spera den promé instansia ku e enfoke lo ta riba e konekshonnan entre Sint Maarten i Saba/Sint Eustatius.
- Na yùni 2023 a informá Tweede Kamer tokante dos investigashon SEO den lokual a eksplorá opshonnan pa kontenido di un PSO pa e konekshonnan menshoná ariba. Tambe a indiká ku ta hopi probabel ku institushon di un PSO ta eksigí un aporte finansiero struktural di gobièrnu, pa lokual ainda no a presupuestá rekursu finansiero. Na desèmber 2023 a mèldu na Tweede Kamer ku BZK, huntu ku ministerionan i partidonan interesá, ta eksplorá e posibilidatnan pa finansiá un PSO, i ku toma di desishon tokante un posibel aporte di gobièrnu pa un PSO lo ta pa un siguiente gabinete. Pero e proposishon di lei mes awor no ta trese obligashonnan finansiero pa e gobièrnu. E ta solamente krea un base legal pa yega na instituí un PSO via un posibel futuro areglo ministerial i pa, via un kontratashon, selektá kompanianan aéreo pa esei.